

Wakita ge Zeṅ ya àbàki enjenjeni ni Ere ye ti mǎdǎmki ka wakita ge Zeṅ ya àbàki enjenjeni ni

Maslaṅa ya ti àbàki wakita hini ni ti àdafay slimi gayaṅ a wakita ni bu ndo. Ay kwa ka mǎnjàki gani ndam ga Yezu ðek tǎsǎra nani Zeṅ zal asak ga Yezu, naṅ bay ya àbàki Ma Mǔweni Sulumani ge Zeṅ ni. Ma gayaṅ ya àbàki ni ti akadǎ ga ma ya mǎdi ahàr a Ma Mǔweni Sulumani ge Zeṅ ni bu ni ; maslaṅa ya ti àbàki wakita cǔeni ni ti mis bilij (gurumkabu Zeṅ 1. 1, 1.14 akaba 1 Zeṅ 1.1 ; Zeṅ 16.24 akaba 1 Zeṅ 1.4 ; pakama ndahaṅ tǎbu kay akadǎ nday nani).

Àbiki ti ana ndam ga Yezu (3.1) ; àzalaya slimi ge mis ahkay do ni ga kǎsa ndo, nahkay mǎdǎm tǎslǎrikaboru wakita hini ana ndam ga Yezu ya a kǎsa gǎrgǎrani bu ni. Zeṅ àdǎm abàki wakita ni ti awayay ti mis ndahaṅ tǎgosay ndam ga Yezu ba (2.26 ; 3.7 ; 4.1), akaba awayay ti tǎsǎr, nday tǎbu àna sifa ya àndav ðay-ðay do ni eðeðij eðeðijeni (5.13).

A wakita ni bu Zeṅ àdǎm maslaṅa ya ti àdǎm àsǎra Yezu a, mǎk agudar zlam kǎlavad ni ti zal malfadǎ : bay ya ti àsǎra Yezu a ni ti ambrǎṅ zlam magudarani gayaṅ ni, àgudar zlam va do. Tamal mǎgudara zlam a mǎk mǎmbatkaba majalay ahàr a ti Yezu ambǎrfǎṅa zlam geli ya mǎgudar na kǎ leli a, ay ahàr àdǎm ndam ga Yezu tǎmbrǎṅ zlam magudarani ðek, adǎba nday bǎza ge Melefit ; Melefit ti nǎjalata. Melefit awayay leli : ahàr àdǎm leli day mǎwayum Melefit akaba ndam gayaṅ ni. Tamal mawayay Melefit ti mǎgudar zlam va do ; nahkay mǎsǎra, leli ndam gayaṅ eðeðij eðeðijeni.

Pakama ya avi sifa ana mis ni

¹ Ere ye ti məbiki ana kuli ka wakita ni ti Pakama ya avi sifa ana mis ni. Kwa ka mənjəki ga məlaṅ naṅ àbu. Pakama gani nani ti ègia mis a. Leli mìcia pakama gayaṅ ya àdəm na, mìaia naṅ àna eri geli a, məmənjələṅa lala, mìnjifiṅa àna ahar geli a daya. ² Sifa gani nani àṅgazlava. Ka ya ti àṅgazlavu ni ti leli mìaia, magray sedi gani, məhi pakama gani ana kuli vay-vay daya. Sifa gani nani ti àndav dáy-dáy do, kwa ahaslani naṅ àbu afa Bəṅ geli Melefit, nihi ti àṅgazliva àna leli a. ³ Ere ye ti leli mìaia akaba mìci ni ti məhi ana kuli bilegeni, ti lekulum day kàdəgumkiva ke leli a, mīgum leli dek akada mis bəlaṅ. Leli ti məbu akada mis bəlaṅ akaba Bəṅ geli Melefit nday ata Wur gayaṅ Yezu *Krist. ⁴ Məbiki pakama hini ana kuli ti, mawayay ti kícum lala, nahkay leli dek aməmərvu ka ahar bəlaṅ lala.

Maslaṅa ya agudar zlam ni ànjəhad akaba Melefit koksah

⁵ Pakama ya ti mìaifiṅa, məhi ana kuli ni ti nihi : Melefit nahəma, masladani njələta, naṅ àbi àna məlaṅ ziṅ-ziṅeni bi ferera. ⁶ Tamal mədəm leli akaba naṅ akada mis bəlaṅ, mək məbu magray zlam e ziṅ-ziṅeni bu nahəma masəkad malfada, ere ya magray ni ti zlam ge jiri do. ⁷ Ay tamal magray zlam a masladani bu akada gayaṅ ya naṅ àbu a masladani bu ni ti leli məbu dek ka ahar bəlaṅ akada mis bəlaṅ. Nahkay mimiz ga Wur gayaṅ Yezu abarafəṅa zlam magudarani geli na kè leli a.

⁸ Tamal mədəm məgudar zlam do ni ti magosay ahàr geli geleni, leli ndam jireni do. ⁹ Ay tamal madafaya zlam magudarani geli na ti Melefit ambərfəṅa kè leli a, abarafəṅa zlam ya àbəlay do na dek kè leli a. Agray nahkay ti adaba naṅ jireni ; ere ye ti àdəm amagray ni ti agray efedəṅ. ¹⁰ Tamal mədəm leli məgudar zlam ndo ni ti kala

mə̀dəm Melefit asəkad malfada. Tamal mə̀dəma nahkay ti mə̀gəskabu pakama gayan a mə̀bəruf geli vu ndo.

2

¹ Gabəza, nəbiki zlam hini ana kuli ti, nawayay ti kəgudarum zlam ba. Ay kwa tamal maslaŋa àgudara zlam a nəngu ni, bay ya ti embikivu ke leli, agri kam-kam ana Bəŋ geli Melefit ni naŋ àbu kè meleher gayan. Bay mim-bikivani ke leli ti Yezu *Krist, naŋ ti mis jireni, àgudar zlam do. ² Àvay vu gayan, tàkad naŋ ti Melefit mām̄bər̄fəŋa magudar zlam geli ni kè leli a. Esliki mām̄bər̄fəŋa zlam magudarani geli na ciliŋ do, esliki mām̄bər̄fəŋa zlam magudarani ge mis ga duniya na dek daya.

Tamal mə̀səra Melefit a ti magray ere ye ti awayay ni

³ Tamal leli mə̀bu magray zlam ya ti Melefit àhi ana mis e *Divi gayan bu grum ni ti mə̀səra leli ti mə̀səra Melefit a. ⁴ Ay tamal maslaŋa àdəm àsəra naŋ a, mək àgray zlam ya ti Melefit àdəm e Divi gayan bu grum ni do ni ti maslaŋa nani asəkad malfada. Naŋ nani ti mis jireni do simiteni. ⁵ Maslaŋa ya ti agray zlam ya Melefit àdəm grum ni ti awayay Melefit àna mə̀bəruf bəlan ededif ededifeni. Tamal magray nahkay ti mə̀səra leli ndam ge Melefit, leli bilifeni akaba naŋ. ⁶ Tamal maslaŋa àdəm anjəhadkabu akaba naŋ nahəma, ahàr àdəm maslaŋa nani agray zlam akada ga Yezu ya àgray ni kwa.

⁷ Zləbəba goro ni, zlam hini ya nəbiki ana kuli ni ti zlam mūweni do. Nani Divi ge Melefit ya ahaslani ni sawaŋ. Kwa ka ya ti kəfumki ahàr ka Yezu ni ti kəsəruma Divi gani nana. Divi gani ya ahaslani nani ti pakama ya təhi ana kuli ni. ⁸ Ay ti pakama ya nəbiki ana kuli ni ti divi mūweni daya. Mis təsər divi gani nani ededif ti àna manjəhad ga Yezu, təsər àna manjəhad gekuli daya. Nahkay məlan

ziŋ-zிŋeni naŋ àbu andav, maslađani sulumani ànjəkia ka maslađana.

⁹ Tamal maslaŋa àđəm naŋ a maslađani bu mək ezirey wur ga məŋani ti maslaŋa nani naŋ e ziŋ-zிŋeni bu mba sawaŋ. ¹⁰ Ay tamal maslaŋa awayay wur ga məŋani ti maslaŋa nani naŋ àbu a maslađani bu, araŋa àbi a məbərurv gayaŋ bu ge mijinjia naŋ ke divi a bi. ¹¹ Ay tamal maslaŋa ezirey wur ga məŋani ti maslaŋa nani naŋ e ziŋ-zிŋeni bu. Naŋ àbu asawađay e ziŋ-zிŋeni bu daya, àsər məlaŋ ya akoru ni do ; èpi divi do ađaba naŋ e ziŋ-zிŋeni bu.

Kəđəbum zlam ga duniya ba

¹² Gabəza, ere ye ti nəbiki ana kəli ni ti nihi : Melefit àmbərfəŋa magudar zlam gekəli na kə kəli azuhva Yezu a.

¹³ Ata bəŋ ga bəza, ere ye ti nəbiki ana kəli ni ti nihi : Lekələm ti kəsəruma bay ya ti naŋ àbu kwa ka mənjəki ga məlaŋ na.

Bəza dagwa, ere ye ti nəbiki ana kəli ni ti nihi : Lekələm ti kiyəmfiŋa kə *Seteni àna kadvu a.

¹⁴ Gabəza, ere ye ti nəbiki ana kəli ni ti nihi : Lekələm ti kəsəruma Bəŋ geli Melefit a.

Ata bəŋ ga bəza, ere ye ti nəbiki ana kəli ni ti nihi : Lekələm ti kəsəruma bay ya ti naŋ àbu kwa ka mənjəki ga məlaŋ na.

Bəza dagwa, ere ye ti nəbiki ana kəli ni ti nihi : Lekələm ti kəbum àna njəda, pakama ge Melefit àbu a məbərurv gekəli bu, kiyəmfiŋa kə Seteni àna kadvu a.

¹⁵ Kəđəbum divi ya ndam ga *duniya tadəbay ni ba, kàwayum zlam ya tədi ahàr a duniya bu ni ba daya. Tamal maslaŋa awayay zlam ga duniya nahəma, maslaŋa nani ti àwayay Bəŋ geli Melefit koksah. ¹⁶ Zlam ga duniya nday nani ya mis tagray ni ti nday hi : tawayay zlam ya məbərurv gatay awayay ni đek, tawayay zlam ya egi eri ni đek,

təngəta zlam a ti tagray zlabay àna naŋ. Zlam nday nani dek ti Bəŋ geli Melefit àdafaki ndo, mis təcayah a duniya bu zlam gatay. ¹⁷ Duniya akaba zlam ya a duniya bu, mis tawayay təngət ni dek naŋ àbu andav. Ay ti maslaŋa ya ti agray ere ye ti Melefit awayay ni ti maslaŋa nani amanjəhad ga kaŋgay-kaŋgayani.

Ndam ezir ge Krist

¹⁸ Gabəza, duniya andav wudak. Kìcuma, təhia ana kuli a zal ezir ge *Krist amara. Ay nihi ti ndam ezir ge Krist təbu kay àndava. Nahkay ti məsəra duniya andav wudak ededŋ. ¹⁹ Ahaslani ndam ezir ge Krist nday nani ti təkibu ke leli, mək təsləkakiba ke leli a. Tamal ti nday ndam geli ededŋ ti akal tənjuhada akaba leli a. Ay ti zlam gani agravu nahkay ti, ti leli məsərkaba nday ndam geli ededŋ do.

²⁰ Lekulum zla nahəma kəbum àna *Məsuf Njəlatani, Yezu Krist àvi ana kuli. Nahkay ti lekulum dek kəsəruma jiri a. ²¹ Nəbiki ana kuli ti kamam ? Ga məhiani ana kuli kəsərums jiri do tək ? Aha, ga məhiani ana kuli kəsəruma sawaŋ. Kəsəruma malfada àbi àhəraya e jiri ba bi daya.

²² Maslaŋa ya ti asəkad malfada kay ni ti way ? Maslaŋa nani ti maslaŋa ya ti àdəm Yezu ti naŋ Krist *Bay gədakani ya amara ni do ni. Maslaŋa nani ti zal ezir ge Krist : àgəskabu Bəŋ geli Melefit nday ata Wur gayan ni ndo. ²³ Maslaŋa ya ti àgəskabu Wur ge Melefit do ni ti àgəskabu Bəŋani Melefit ndo daya. Maslaŋa ya ti agəskabu Wur ge Melefit ni ti àgəskabá Bəŋani Melefit a daya.

²⁴ Lekulum zla ti ere ye kicəm kwa ka sarta ya kəfumki ahər ka Yezu Krist ni ti ahər àdəm ere gani nani mənjuhəd a məbəruf gekuli bu. Tamal ere ye ti kicəm kwa ka sarta ya kəfumki ahər ka Yezu ni anjuhəd a məbəruf gekuli bu ni ti lekulum day akanjuhədum akaba Wur ge Melefit nday

ata Bəjani akada mis bəlaŋ. ²⁵ Ere gani nani dek ti *sifa ya andav day-day do ni. Sifa gani nani ti Yezu adəm aməvi ana leli.

²⁶ Zlam gani nday nani dek nəbiki ana kəli ti adaba mis tawayay magosay kəli palam. ²⁷ Lekuləm zla nahəma kəbum àna Məsuf Njəlatani, Yezu Krist àvi ana kəli. Məsuf gani nani ti àbu manjəhadani a məbəruf gekəli bu. Nahkay ti wudəra gekəli àbi akaba bay macahi zlam nahəŋ ana kəli va bi : Məsuf Njəlatani nahəŋ àbu acahi zlam dek ana kəli. Nahəŋ ti àsəkad malfada do, zlam gani ya acahi ana kəli ni ti ma ge jiri. Ahər adəm kənjəhadum akaba Yezu Krist akada mis bəlaŋ ; Məsuf Njəlatani àcahi ana kəli ni ti nahkay.

²⁸ Gabəza, nihi ti ahər adəm kənjəhadum akaba Yezu akada mis bəlaŋ. Adaba mam, nawayay ti ka ya ti aməŋga ni ti aŋgwaz àwər leli ba. Ka ya ti aməzlərəvaya ni ti nawayay ti mimili àwərfəŋa leli ga mahədakfəŋiani ba. ²⁹ Kəsəruma Yezu Krist ti nahəŋ jireni. Nahkay ahər adəm kəsəruf maslaŋa ya ti nahəŋ àbu agray zlam jireni ni ti maslaŋa gani nani Melefit ègia bəjəna daya.

3

Leli bəza ge Melefit

¹ ŋga pəm day, Melefit àwaya leli a dal-dal ni ! Nahkay àzala leli bəza gayəŋ a. Iy, leli bəza gayəŋ edeđiŋ ! ŋgay leli bəza ge Melefit ti ndam ga *duniya təsər do, adaba nday nani təsər Melefit ndo palam. ² Zləbəba goro ni, nihi ti leli bəza ge Melefit andava. Ay ti emigi mam kama ni mam ti Melefit adəfiaba ana leli a faŋ ndo. Ere ye ti məsəra nahəma, ka ya ti aməzlərəvaya ni ti emigi akada gayəŋ ni, adaba emipi nahəŋ lala. ³ Maslaŋa ya ti ajəgay Yezu *Krist, awayay egi akada nahəŋ ni ti, maslaŋa nani abi slimi ana

ahàr gayañ, àgudar zlam do, akada ga Yezu ya àgudar zlam do ni.

⁴ Maslaṅa ya ti naṅ àbu agudar zlam nahəma, àgəskabu *Divi ge Melefit ya a Wakita gayañ ni bu ni ndo. Ndam magudar zlam ti ndamam ? Nday ndam ya tàwayay divi ge Melefit do ni. ⁵ Ay ti kəsəruma Yezu Krist àra a mələṅ va ga məhəlfəṅa zlam magudarani geli kè leli a. Kəsəruma naṅ ti àgudar zlam do simiteni. ⁶ Maslaṅa ya ti naṅ àbu anjəhad akaba naṅ akada mis bələṅ ni ti àgudar zlam va do. Ay ti maslaṅa ya ti naṅ àbu agudar zlam nahəma, èpi Yezu day-day ndo, àsər naṅ do daya.

⁷ Gabəza, mis tàgosay kəli ba. Maslaṅa ya ti naṅ àbu agray zlam ge jiri ni ti naṅ mis jireni akada Yezu Krist naṅ jireni ni. ⁸ Maslaṅa ya ti naṅ àbu agudar zlam nahəma, naṅ wur ge *Seteni. Adaba mam, kwa ahaslani Seteni naṅ àbu agudar zlam zlam gayañ, àmbrəṅ ndo. Nahkay Wur ge Melefit àra a duniya va : àra ti ga maslamalay zlam ya Seteni agudar ni dək.

⁹ Maslaṅa ya ti Melefit ègia bəṅana ni ti àgudar zlam va do. Adaba mam, Melefit àvia Məsuf Njəlatana, àniviyu a məbəruf bu, naṅ àbu anjəhad akaba naṅ. Nahkay maslaṅa gani nani èsliki magudar zlam va do, adaba Melefit ègia bəṅana. ¹⁰ Məsərkaba way wur ge Melefit ni way ahkay do ni way wur ge Seteni ni way ti nahkay hi : maslaṅa ya ti àgray zlam ge jiri do ni ti naṅ wur ge Melefit do. Maslaṅa ya ti àwayay wur ga mənani do ni ti naṅ day wur ge Melefit do.

Ahàr àdəm mawayumvu

¹¹ Nahkay ti mawayumvu e kidin geli bu. Hini ti pakama ya kicəm kwa ka sarta ya kəfumki ahàr ka Yezu ni. ¹² Məgrum akada ga *Kayin ya àgray ni ba. Naṅ ti wur ge *Seteni, nahkay àkad wur ga mənani ndaf ga njəda. Àkad

wur ga mənani gani ti kamam jikeṅ mam ? Àkad wur ga mənani ni ti adaba zlam ga wur ga mənani ya àgray ni dek ge jiri, zlam gayanṅ gayanṅani ya àgray ni dek magədavani palam.

¹³ Bəza ga mmawa, tamal ndam ga *duniya tizirey kuli ti àgri ejep ana kuli ba. ¹⁴ Leli ti məsəruma Melefit àhəṅgaraba leli e kisim ba, àvia sifa ana leli a àndava. Məsəruma ti adaba mawayum bəza ga mən geli. Maslaṅa ya ti àwayay mis do nahəma, Melefit àhəṅgaraba naṅ a ndo, naṅ məmətani. ¹⁵ Maslaṅa ya ezirey wur ga mənani ni ti naṅ bay makad mis. Ay kəsəruma bay ya ti akad mis nahəma, *sifa ya àndav dāy-dāy do ni ti àniviyu a məbəruf bu bi. ¹⁶ Yezu *Krist ti àwaya leli a, àgəskabu ti tākad naṅ azuhva leli. Àdəfiki mawayavani ana leli ti nahkay. Leli day ahàr àdəm məjənaki bəza ga mən geli, ku tamal tabazl leli azuhva tay nənṅu ni məgəskabu. ¹⁷ Tamal ti maslaṅa zlam gayanṅ àbu, èpi ti zlam àfəṅ kà wur ga mənani bi mək àmənjaləṅ do nahəma, àbəlay do. Maslaṅa nani ti awayay mis akada ge Melefit ya awayay mis ni tata aw ? Aha, àwayay do. ¹⁸ Gabəza, mawayum mis àna pakama ciliṅ ba, ahàr àdəm mawayum mis ededif, məgri zlam sulumani ana tay.

Bəza ge Melefit ti aṅgwaz àwərfəṅa tay kə Melefit a do

¹⁹ Tamal magray nahkay ti aməsər leli ti ndam jireni, aṅgwaz aməwərfəṅa leli kə Melefit a do daya. ²⁰ Ku tamal məhi ana ahàr məgudara zlam a nənṅu ni, aṅgwaz aməwərfəṅa leli a do, adaba Melefit àsəra ere ye ti a məbəruf geli bu na àtama leli lelana ; naṅ ti àsəra zlam a dek. ²¹ Zləbəba goro ni, tamal məsəra məgudar zlam ndo nahəma, aṅgwaz aməwər leli kə meleher ge Melefit do. ²² Nahkay zla nahəma, aməvi ere ye ti mihindifiṅa ni dek ana leli, adaba leli məbu magray ere ye ti àhi ana leli

grum ni akaba ere ye ti àbɛlafəŋ ni. ²³ Ere ye ti àhi ana leli grum ni ti nihi : si məfəki ahàr ka Wur gayaŋ Yezu *Krist akaba mawayumvu e kidiŋ geli bu kwa. Àhi ana leli grum ti nahkay. ²⁴ Nahkay maslaŋa ya ti agray ere ye ti Melefit àhi ana leli grum ni ti maslaŋa nani ti naŋ àbu akaba Melefit akada mis bəlaŋ. Məsər ti Melefit naŋ àbu akaba leli ti ahəmamam ? Məsər ti adaba àvia *Məsuf gayaŋ ana leli a.

4

Məsər Məsuf ge Melefit ti ahəmamam ?

¹ Zləbəba goro ni, ndam ya tədəm təzlapay àna njəda ga *Məsuf ni dək ti kəgəsumkabu pakama gatay ni ba. Hojo sayumfəŋa kà tay a day, akal ti nday təbu àna Məsuf ge Melefit aw. Adaba mam, mis dal-dal təbu a duniya bu, tədəm nday ndam mahəŋgaray *pakama ge Melefit, ambatakani do nday ndam masəkad malfada sawaŋ. ² Akəsərurum ti maslaŋa hini azlapay àna njəda ga Məsuf ge Melefit ti nahkay hi : ndam ya ti tədəm vay-vay Yezu *Krist àra a duniya va, ègia mis hihirikena ti, nday dək təzlapay àna njəda ga Məsuf ge Melefit. ³ Ay ti maslaŋa ya ti àdəm Yezu àra a duniya va ndo ni ti, maslaŋa nani àdəm ma ge Melefit do, azlapay àna njəda ga məsuf ga zal ezir ge Krist sawaŋ. Lekulum kicuma məsuf gani nani amara a duniya va : nihi ti ènjia àndava.

⁴ Gabəza, lekulum ti bəza ge Melefit. Nahkay kiyumfiŋa kà ndam nday nana ya tasəkad malfada na. Adaba mam, Məsuf ya àniviyu ana kuli ni àtama məsuf ya àniviyu ana ndam ga *duniya na. ⁵ Ndam nday nani ya tasəkad malfada ni ti nday ndam ga duniya. Təzlapaki ti ka zlam ga duniya, nahkay ndam ga duniya təgəsiki ma gatay ni ana tay. ⁶ Leli zla nahəma, leli bəza ge Melefit. Nahkay maslaŋa ya ti àsəra Melefit a ti agəsiki ma geli ni ana leli.

Ay maslaña ya ti nañ wur ge Melefit do ni ti àgəsiki ma geli ni ana leli do. Məsərkaba məsuf ya adəm jiri na nday ata məsuf ya asəkad malfada na ti nahkay.

Melefit adəfiki ana leli ahəmamam mawayumvu ni

⁷ Zləbəba goro ni, ahər adəm mawayumvu e kidinğ geli bu kwa, adaba bay ya ti agray ti mis tawayavu ni ti Melefit. Nahkay maslaña ya ti nañ àbu awayay mis nahəma, Melefit ègia bəñana. Maslaña nani ti àsəra Melefit a. ⁸ Ay maslaña ya ti àwayay mis do nahəma, nañ ti àsər Melefit do, adaba Melefit ti ere ye ti agray ni dek, agray ti adaba awayay mis. ⁹ Melefit adəfiki ana leli, nañ awayay leli ti ahəmamam ? Adəfiki ana leli ti nahkay hi : àslərbıyu Wur gayan bilinğ bilinğeni ni a duniya vu ga məvi sifa gayan ana leli. ¹⁰ Mawayavani ti məğ ga mam ? Leli mawayay Melefit enji aw ? Aha ! Melefit àwayay leli enji sawan. Nahkay àslərbıyu Wur gayan ti təkad nañ. Təkada nañ a ti Melefit esliki məmbərfəña zlam magudarani geli ni kè leli a.

¹¹ Zləbəba goro ni, Melefit àwayay leli ti nahkay. Tamal àwayay leli nahkay ti àgəsiki ti leli day mawayumvu e kidinğ geli bu bilegeni kwa. ¹² Melefit ti maslaña ya ti èpia nañ a bir ni ti àbi. Ay tamal mawayumvu e kidinğ geli bu ni ti məsəra Melefit nañ àbu akaba leli, mığia akada mis bəlanğ akaba nañ a. Məsəra leli məbu mawayay mis àna hud bəlanğ akada gayan ya awayay mis ni.

¹³ Leli məbu akaba nañ, nañ day nañ àbu akaba leli akada mis bəlanğ ti məsər ti ahəmamam ? Məsər ti adaba àvia *Məsuf gayan ana leli a palam. ¹⁴ Leli zla ti mığia Wur ge Melefit a, məsəra Bəñani Melefit àslərbıyu nañ ti mıği Bay mahəngay mis ga duniya. Nahkay məhi ana mis zlam nani ti àgrava ededinğ a. ¹⁵ Maslaña ya ti adəm vay-vay Yezu nañ Wur ge Melefit nahəma, maslaña nani ti Melefit

naṅ àbu akaba naṅ, naṅ day naṅ àbu akaba Melefit akada mis bəlaṅ. ¹⁶ Leli ti mèsəra Melefit awayay leli, mègəskabá pakama gani nana.

Melefit ti ere ye ti agray ni dək agray ti adaba awayay mis. Maslaṅa ya awayay mis nahəma, maslaṅa nani ti naṅ àbu akaba Melefit, Melefit day naṅ àbu akaba naṅ, nday cəeni akada mis bəlaṅ. ¹⁷ Məsər ti leli məbu mawayay mis àna hud bəlaṅ akada ge Melefit ya awayay leli ni ti ahəmamam ? Məsər ti adaba kwa kani, vad ya ti Melefit amagrafəṅa seriya kè mis a ni ti àsi aṅgwaz ana leli do simiteni. Àsi aṅgwaz ana leli do ni ti adaba zlam ya ti leli məbu magray a duniya bu ni ti akada ga Yezu ni. ¹⁸ Aṅgwaz ti tarakaboru nday ata mawayavani do. Tamal mawayay mis àna hud bəlaṅ ti məgray aṅgwaz koksah. Adaba mam, tamal aṅgwaz awər mis nahəma, àsəra atatraḅ naṅ. Maslaṅa ya ti aṅgwaz awər naṅ nahəma, ḡgay Melefit awayay naṅ àna hud bəlaṅ ti àsərkaba lala faṅ do.

¹⁹ Leli ti mawayum Melefit, mawayum mis adaba Melefit àwayay leli enji. ²⁰ Tamal mis àdəm : « Nu ti nawayay Melefit » mək ezirey wur ga məṅani nahəma, maslaṅa nani asəkad malfada. Adaba mam, wur ga məṅani ya ti epi ni tekeḅi àwayay naṅ do ni ti awayay Melefit ti ahəmamam ? Èpi naṅ do ni ! ²¹ Divi ga Yezu ya àdəfiki ana leli ni nihi : àdəm maslaṅa ya ti awayay Melefit ti ahər àdəm mawayay wur ga məṅani daya.

5

Maslaṅa ya ti afəki ahər ke Melefit ni ti eyefiṅ kà zlam ga duniya

¹ Maslaṅa ya ti àgəskabá, adəm Yezu ti naṅ *Krist *Bay gəḅakani ya amara ni ti Melefit ègia Bəṅjana. Tamal maslaṅa awayay bəṅ ga bəza nahəma, awayay bəza ni daya. ² Məsər mawayay bəza ge Melefit ti ahəmamam ?

Məsər ti adaba məbu mawayay Melefit, məbu magray zlam ya àhi ana leli grum ni daya. ³ Mawayay Melefit ti məsər ahəmamam ? Məsər ti adaba məbu magray zlam ya ti àhi ana leli e Divi gayaṇ bu grum ni kəlavad. Divi gayaṇ gani nani ti zləzlada do, ⁴ adaba ku way way do tamal Melefit ègia bəṇana nahəma, njəda gayaṇ àtama njəda ga zlam ga duniya ; zlam nday nani tèsipet naṇ koksah. Njəda ya àtam njəda ga zlam ga duniya ni ti mam ? Njəda gani nani ti məfəki ahàr geli ka Yezu. ⁵ Njəda ga way àtama njəda ga zlam ga duniya ni way ? Si ga maslaṇa ya ti àfəki ahàr ka Yezu, àdəm Yezu ti naṇ Wur ge Melefit ni.

Zlam ya ti adafaki Yezu naṇ Wur ge Melefit ni

⁶ Yezu *Krist ti àra a duniya va, àhuriyu a yam vu, *təbaray naṇ, kələṇ gani təbaya mimiz gayaṇ a. Təbaray naṇ àna yam ciliṇ do, təbaray naṇ àna yam, təbaya mimiz gayaṇ a daya. Məsər ti pakama nani ma ge jiri ti adaba *Məsuf ge Melefit àhia ana leli a. Məsuf gani nani ti ere ye ti adəm ni dek ma ge jiri. ⁷⁻⁸ Adafaki Yezu Wur ge Melefit edediṇ ti Məsuf, yam, mimiz. Nday mahkərani ni ti tədafaki zlam bəlaṇ. ⁹ Tamal məgəsumkabu pakama ge mis ya tədəm ni ti ahàr àdəm məgəsumkabu pakama ge Melefit ya àdəm ni daya, adaba Melefit ti naṇ gədakani, àtam mis dek. Pakama ge Melefit ya àdəm ni ti àdəmki ka Wur gayaṇ Yezu Krist. ¹⁰ Maslaṇa ya ti afəki ahàr ka Wur ge Melefit nahəma, àsəra a ahàr gayaṇ ba pakama ge Melefit gani nani ti ma ge jiri. Ay maslaṇa ya ti àgəskabu pakama ge Melefit ya ti àdəm ni do ni ti maslaṇa nani àdəm Melefit àsəkad malfada. Adaba mam, àgəskabu pakama ge Melefit ya àdəmki ka Wur gayaṇ Yezu Krist ni do. ¹¹ Melefit àhi mam ana leli mam ? Àdəm àvia *sifa ya àndav day-day do ni ana leli a. Sifa gani nani ti mənṅət azuhva Wur gayaṇ Yezu Krist. ¹² Maslaṇa ya ti àgəskabá

Wur ge Melefit a ni ti àṅgəta sifa. Maslaṅa ya ti àgəskabu
Wur ge Melefit ndo nahəma, àṅgət sifa ndo.

Sifa ya àndav day-day do ni

¹³ Pakama gani nani ti nəbiki ana kuli adaba kəfumkia
ahər ka Wur ge Melefit a ; nawayay ti kəsərum lekulum
kəbum àna *sifa ya àndav day-day do ni. ¹⁴ Ka ya ti
mahəṅgalay Melefit ni ti ere ye ti avi njəda ana leli ni ti
nihi : məsəra tamal mihindiliṅa zlam ya ti àbəlafəṅ na ti
eciiki ma geli ni ana leli. ¹⁵ Tamal məsəra naṅ àbu eciiki
zlam ya ti mihindiliṅ ni ana leli ti məsəra məṅgəta zlam
ya mihindi na àndava.

¹⁶ Bi wur ga muk agudar zlam, zlam magudarani nani
àzoru mis e kisim vu do, tamal kipia naṅ a ti həṅgali
Melefit. Nahkay ti Melefit aməvi sifa ana maslaṅa ya ti
àgudar zlam ni, tigi ti zlam magudarani gayəṅ ni àzoru
mis e kisim vu do ni. Zlam magudarani ya ti azoru mis
e kisim vu ni ti àbu. Nəhi ana kuli həṅgalum Melefit ti
azuhva nani do. ¹⁷ Zlam ge mis ya tagray ni dek ti tamal
tàgray ge jiri do ni ti dek zlam magudarani. Ay ti zlam
magudarani ndahaṅ ya təzoru mis e kisim vu do ni ti təbu.

¹⁸ Məsəra maslaṅa ya ti Melefit ègia Bəṅana nahəma,
àgudar zlam va do, Wur ge Melefit ajəgay naṅ. Nahkay
zla nahəma *Seteni àgosay naṅ koksah.

¹⁹ Məsəra Bay ya ti leli ndam gayəṅ ni ti Melefit. Məsəra
ndam ya tadəbay zlam ga duniya ni dek ti nday ndam ge
Seteni.

²⁰ Məsəra Wur ge Melefit àra. Àra ti àvi njəda ana leli ga
məsər Melefit Melefiteni. Nahkay leli məbu manjəhadani
akada mis bəlaṅ akaba Melefit Melefiteni, àna njəda ga
Wur gayəṅ Yezu *Krist. Yezu Krist ti Melefit Melefiteni.
Avay sifa ya àndav day-day do ni ti naṅ gani ciliṅ.

²¹ Gabəza, pəra akaba zlam ndahaṅ ya ti ge Melefit do
nahəma, kəgəsumkabu ba.

Ma Mūweni Sulumani ge Melefit
New Testament in Muyang

copyright © 2013 Wycliffe Bible Translators, Inc.

Language: Muyang

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Muyang

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

